

Ikiaroonartut pillugit Namminersorlutik Oqartussat nalunaarutaat

Ikiaroonartut pillugit Inatsisartut inatsisaanni nr. 24, 25. november 2022-meersumi §§ 1, 2 aamma 4 aamma § 5, imm. 2 aamma 3 naapertorlugit aalajangersarneqarput:

Nassuiaatit

§ 1. Nalunaarummi uani ikiaroonartut pineqartut imatut paasineqassapput nakorsaait, naasut aamma uumasunit naasuniillu nakorsaasiat, nalunaarummut allattorsimaffinnut A-mut, B-mut, C-mut, D-mut E-mullu ilanngunneqartut, ikiaroornermik sunniuteqartarnerannik sunniuteqartannginnerannilluunniit erseqqissumik uppersaateqarnersut apeqquaatinnagit kiisalu taratsut aammalu ikiaroonartunit pineqartunit pileriaannaat. Tassunga ilanngullugit esterit æterillu, ikiaroonartut taakkulu tarajui imaluunniit taakkunanit pilertut akoqanngilluinnarnersut, ilaannakortumik sanaajunersut, pinngortitameersuunersut akuutissanilluunniit sananeqarsimanersut apeqquaatinnagit. Ikiaroonartunik taamatuttaaq paasineqassapput piareersakkat allattorsimaffimmi ikiaroonartunik, naasunik aamma uumasunit naasuniillu nakorsaasiassanik kiisalu taratsunik ikiaroonartuniillu pineqartunit pileriaannarnik taaneqartunik akullit sananeqarsimasulluunniit tamarmik, taamaattorli imm. 4 takuuk.

Imm. 2. Imm. 1-imi taaneqartunik allattukkanik nutarsaanissap pisariaqarnera pillugu naalakkersuisoqarfiup ilisimatinneqarnissaannut Nunatsinni Nakorsaaneqarfik pisussaaffeqarpoq.

Imm. 3. Piareersakkanik pineqarput: arrortitat, kimikillisakkat, tangit qalatat, kimittusisitsinerit, imigassami arrortitsinerit, sunilluunniit nakorsaasiornikkut nakorsaatisat, kiisalu ikiaroonartunik aamma uumasunit naasuniilluunniit nakorsaasiassanik piareersakkat, taamaalilluni ikiaroonartut pissutsimikkut allanngortinneqarnatik.

Imm. 4. Ikiaroonartunut imm. 1-imi taaneqartunut ilaanngillat allattorsimaffimmi B-mi nr. 59-imut eqqaanartut taakkuninngalu piareersarneqarsimasut uumasunit naasuniilluunniit nakorsaasiassat, piumasaqaatit uku naamassineqarsimappata:

- 1) uumasunit naasuniilluunniit nakorsaasiassaq imaluunniit piareersagaq tetrahydrocannabinolimit akoqanngippat imaluunniit tetrahydrocannabinolimit annerpaamik 0,2 pct.-imik akoqarpat,
- 2) uumasunit naasuniilluunniit nakorsaasiassaq imaluunniit piareersagaq Nunatsinni Nakorsaaneqarfiup akuerisaanit eqqussuisut arlaannit nunamut eqqunneqarsimappat, tak. § 9, aamma
- 3) uumasunit naasuniilluunniit nakorsaat imaluunniit piareersagaq maani nunami quersuarmi assigisaanilluunniit, inatsisitigut pisinnaatitaasumiit pisussaataasumiillu oqartussaaffigineqartumi tiguneqareerluni siammarternissaa siunertaralugu immikkoortukkuutaarlugit eqqunneqarpat.

Allattuiffimmi A-mi, B-mi, C-mi, D-mi aamma E-mi allanneqarsimasunut ikiaroonartunut aalajangersakkat nalinginnaasut

§ 2. Ikiaroonartut allattuiffimmi A-mi allanneqarsimasut maani nunatsinneeqqusaanngillat, Nunatsinni Nakorsaaneqarfik immikkorluinnaq pisoqarneratigut aamma erseqqinnerusumik aalajangersarneqartumik piumasaqarnikkut tamatumunnga akuersisimanngippat.

Imm. 2. Imm. 1 malillugu akuersisummut ilaasut eqqaassanngikkaanni ikiaroonartunik imm. 1-imi taaneqartunik eqqussineq, annissineq, tunisineq, pisineq, tunniussineq, tigusineq, sananeq, piareersaaneq paarisaqarnerlu inerteqqutaapput.

§ 3. Ikiaroonartut nunami maani taamaallaat nakorsaanissaq imaluunniit ilisimatusarnissaq siunertaralugu atorneqaqqusaapput.

Imm. 2. Ikiaroonartunik eqqussineq, annissineq, tunisineq, pisineq, tunniussineq, tigusineq, sananeq, piareersaaneq paarisaqarnerlu taamaallaat nalunaarummi matumani aalajangersakkat naapertorlugit pisinnaapput.

Tunniussineq

§ 4. Nakorsaatit pillugit inatsisartut peqqussutaat naapertorlugu malittarisassat matumunnga aalajangersarneqartut naapertorlugit ikiaroonartunik nakorsaatissatut atugassanik tunniussinissaq taamaallaat akuerisaavoq.

Tigusineq paarisaqarnerlu

§ 5. Ikiaroonartunik tigusineq paarisaqarnerlu ukununnga taamaallaat akuerineqarpoq:

- 1) Inuit ingerlataqarfillu malittarisassat qaquguluunniit atuuttut naapertorlugit nakorsaatissanut allagartat imaluunniit allagaq naapertorlugu ikiaroonartunik tigusisut, imaluunniit nakorsaatinik nassiussuinermit malittarisassat atuuttut naapertorlugit uumasut nakorsaannit imaluunniit nakorsamit ikiaroonartunik tigusisut.
- 2) Inuit katsorsartinnermut atatillugu nakorsamit, kigutit nakorsaannit, umiarsuup naalagaanit imaluunniit timmisartortartut naalagaannit ikiaroonartunik pisartagaqartut.
- 3) Pisortanit pigineqartut pinngortitalerinikkut, nakorsatut ilisimatusarnermi atortorissarutitigullu laboratoriat ingerlataqarfillu laboratoriami imaluunniit pisortat suliffianni pineqartumi pisortap arlaannit atsiorneqarsimasoq allagartaq naapertorlugu ikiaroonartut ilisimatusarnermi atornissat siunertaralugu ikiaroonartunik pisartagaqartut.
- 4) Nunatta Nakorsaataasivia, nunap immikkoortuini napparsimmaviit, peqqissaaviit, peqqissaasoqarfiit il.il., aammalu uumasut nakorsaat.
- 5) Inuit, suliffeqarfiit, laboratoriat ingerlataqarfillu Nunatta Nakorsaaneqarfianit matumunnga akuerineqarsimasut.

Toqqortaatit

§ 6. Nunatta Nakorsaataasivia, nunap immikkoortuini napparsimmaviit allallu ikiaroorntunik tunniussinissamut pisinnaatitaasut ingerlatsinerup nalinginnaasup attannissaanut piumasarineqartunit allanik ikiaroorntunik amerlanerusunik uninngasuuteqaqqusaanngillat.

Imm. 2. Ikiaroorntut Nunatta Nakorsaataasiviani, nunap immikkoortuini napparsimmavinni, peqqissaavinni, peqqissaasoqarfinni il.il. aammalu uumasut nakorsaqaqfinni, ikiaroorntut nakorsaatit pillugit Inatsisartut peqqussutaat naapertorlugu aalajangersarneqartumi tamanna pillugu malittarisassat atuuttut malillugit inissineqassapput.

Imm. 3. Ikiaroorntut illersorneqarsinnaasumik aamma inunnit susassaqanngitsunit tikikkuminaatsuni kiisalu inuussutissanit inuulluarniutiniillu immikkoortillugit inissineqarsimassapput.

Imm. 4. Ikiaroorntunik inissiineq illersorneqarsinnaasumik poortorneqarsimassapput imarisaata taaguutaanik nalunaaqutserneqarsimallutik.

Nioqquteqarneq

§ 7. Ikiaroorntunik nioqquteqarneq Nunatta Nakorsaataasivianut aamma nakorsaatit pillugit inatsisartut peqqussutaat malillugu maleruagassat aalajangersorneqarsimasut malillugit, nunap immikkoortuisa napparsimmaviannut kiisalu inunnut suliffeqarfinnullu Nunatsinni Nakorsaaneqarfimmit tamatumunnga akuersissuteqartumit taamaallaat akuerisaavoq.

Imm. 2. Akuersissummiit erseqqissumik allamik allassimasoqanngippat taamaallaat tassaniippoq nakorsaasiornikkut immikkut suliatut isikkoqartunik imaluunniit poortorneqaqqaarsimanerini ammarneqarsimanngitsuni taamatut tiguneqarlutik poortorneqarsimatillugu tuneqqinneqartussanik, poortoqqinneqarsimanngitsunik imaluunniit oqimaalutaqqineqarsimanngitsunik ikiaroorntunik nunami maani nioqquteqarsinnaaneq. Akuersissummit allamik allassimasoqanngippat tassunga aamma ilaanngilaq ikiaroorntunik eqqussisinnaaneq imaluunniit annissisinnaaneq.

Imm. 3. Ikiaroorntunik niuernissamut akuersissut, akuersissummi erseqqissumik allamik allassimasoqanngippat, akuersissummi allassimasumiit najukkamiit niuernermut killeqartinneqarpoq. Immikkoortortaniit niuerneq immikkut akuersissuteqarnermik pisariaqartitsivoq taamaallaallu pingaarnertut quersuarmit tiguneqartuniit poortukkanit ammarneqanngitsuniit pisinnaalluni. Eqqussineq annissinerlu

§ 8. Ikiaroorntunik allattorsimaffimmi A-mi, B-mi, C-mi, D-mi aamma E-mi allassimasunik eqqussineq annissinerlu nakorsaatit pillugit inatsisartut peqqussutaat naapertorlugu matumunnga malittarisassat aalajangersarneqartut naapertorlugit taamaallaat akuerisaapput.

Imm. 2. Imm. 1 ikiaroorntunut allattorsimaffinni D-mi aamma E-mi allassimasunut, matumunnga aalajangersakkat aalajangersarneqartut naapertorlugit umiarsuarni nakorsaataasivinniittunut imaluunniit timmisartuni ikiueqqaarnermi karsiniittunut imaluunniit Naalagaaffeqatigiinnermi ilaaniittunut nassiussinernut atuutinnilaq.

§ 9. Nunatsinni Nakorsaaneqarfik allakkatigut qinnuteqaammik tigusaqarnerup kingorna allattorsimaffik B-mi nr. 59-imi allanneqartunut eqqaanartunik taakkuninngalu piareersakkanik uumasunit naasuniilluunniit nakorsaatinik, ilisimatitsissutigineqartut malillugit tetrahydrocannabinolimik

akoqanngitsut imaluunniit tetrahydrocannabinolimit annerpaamik oqimaassusaata 0,2 pct.-ianik akulinnik eqqussinnermut akuersissuteqarsinnaavoq.

Imm. 2. Imm. 1 naapertorlugu qinnuteqaatit paasissutissanik Nunatsinni Nakorsaaneqarfiup akuersissummik tunniussisinaanissaanut pisariaqarsorisaaq imaqassapput, tassunga ilanngullugit:

1) Paasissutissat uumasunit naasuniilluunniit nakorsaatisiassap piareersakkalluunniit nioqqutissami erseqqissumik nassuiarneqarsimasumi suussusersineqarsinnaasumiluunniit atorneqarsimaneramik nassuiaasut, aamma

2) nioqqutissami § 1, imm. 4, nr. 1-imi piumasaqaatip eqqortinneranik uppersarsaat.

Imm. 3. Imm. 1 naapertorlugu akuersissutit taamaallaat inatsisitigut pisinnaatitaasunut pisussaataasunullu nalunaarutigineqarsinnaapput.

Imm. 4. Imm. 1 naapertorlugu inatsisitigut pisinnaatitaasut pisussaataasullu uumasunit naasuniilluunniit nakorsaasiassanik eqqussinissamut akuerineqarsimasut akisussaaffigivaat, tunisassiani eqqunneqartuni tamani § 1, imm. 4, nr. 1 naapertorlugu tetrahydrocannabinolimit annerpaamik oqimaassusaata 0,2 procentianik akulinnut killissarititaasoq malinneqassasoq.

Imm. 5. Akuersissummik pissarsinnermi piumasaqaatinik sukumiinerusunik Nunatta Nakorsaaneqarfia aalajangersaasinnaavoq. Akuersissummik naammassinnittoqanngippat Nunatta Nakorsaaneqarfia akuersissut atorunnaarsissinnaavaa.

§ 10. Ikiaroornartunik eqqussineq aamma annissineq taamaallaat Naalagaaffeqatigiinnerup iluani nuna ataaseq aqqutigalugu pisinnaavoq.

Sananeq, naatitsineq poortueqqinnerlu

§ 11. Ikiaroornartunik allattorsimaffinni A-mi, B-mi, C-mi, D-mi aamma E-mi allanneqarsimasunik naatitsineq sananerluunniit, imatut paasillugu ikiaroornartunik kemi atorlugu allanngortitsinikkut imaluunniit pinngortitameersunik sanaassanit immikkoortitsinikkut ikiaroornartunik taama itturnik pilersitsinerit kiisalu ikiaroornartunik taama itturnik allanngortitsinerit nakorsaatis pillugit inatsisartut inatsisaat naapertorlugu matumunnga malittarisassat atuuttut naapertorlugit taamaallaat akuerisaapput.

Imm. 2. Imm. 1 aamma ikiaroornartunik misileraalluni naatitsinnernut, sananernut imaluunniit allanngortinniarnernut atorneqarpoq.

Imm. 3. Imm. 1-imi taaneqartutut suliaqarnermi, inuit susassaqqanngitsut ikiaroornartunut periarfissaqqassanngillat aamma ikiaroornartunik taama itturnik peqquserlulluni ilanngaasoqarnissaata pinaveersaartinnissaanik qulakkeerinninniarluni nakkutiginnittoqassalluni.

Imm. 4. Imm. 1-imi taaneqartunik ikiaroornartunik poortukkat niuertarfinnut niuertunillu pilersuisunut naatsorsuutigineqartut imatut matoqqassapput poortukkap ammarneqarsimanera ajornanngitsumik takuneqarsinnaalluni.

Imm. 5. Imm. 1-imi aamma 2-mi aalajangersakkat pisortanit pigineqartuni pinngortitalerinikkut, nakorsaanermit ilisimatusarfinni atortorisarutitigullu laboratoriani suliffinnillu ilisimasartusarnissaq siunertaralugu allattuiffik D-mi aamma E-mi ikiaroornartunik allassimasunik sananermut imaluunniit allanngortitsinnermut atorneqassanngillat.

Naatsorsuutit

§ 12. Nunatta Nakorsaataasivia, nunap immikkoortuini napparsimmaviit, peqqissaaviit, uumasut nakorsaat kiisalu umiarsuit naalagai aamma timmisartuni ikiueqqaarnerni atortunut akisussaasut, nakorsaatit pillugit Inatsisartut peqqussutaat naapertorlugu aalajangersarneqartuni tamanna pillugu malittarisassat qaqugukkulluunniit atuuttut naapertorlugit allattorsimaffik A-mi, B-mi, C-mi, D-mi aamma E-mi allassimasunik ikiaroonartunik uninngasuutit pillugit naatsorsuusiortassapput.

Imm. 2. Inuit, suliffeqarfiit, laboratoriat ingerlataqarfillu Nunatsinni Nakorsaaneqarfimmit imm. 1-imi allanneqarsimasunik ikiaroonartunik ingerlataqarnissamut akuersissuteqartut, ikiaroonartut pillugit imatut naatsorsuusiortassapput, paasissutissat ukununga tunngasut qaqugukkulluunniit takuneqarsinnaassallutik:

- 1) Pisineq, tassunga ilanngullugu eqqussineq, suuneri, annertussusii, pilersuisoq, toqqorsivimmut eqqunneranut ulloq, akiligassamut innersuussineq eqqussinermilu uppersaasatip normua allassimassallutik.
- 2) Tunisineq, tassunga ilanngullugu annissineq, nr. 1-imi allanneqarsimasunut naapertuuttumik allanneqartut.
- 3) Piareersakkanut atuineq. Piareersakkanik sananerni tamani ikiaroonartunik aamma uumasunit naasuniilluunniit nakorsaasiassanik atuineq pillugu naatsorsuusiortoqassaaq. Piareersakkat nalunaarummi matumani aalajangersakkanut tunngasut eqqarsaatigalugit, piareersakkanit pineqartunit iluanaarutit aamma sananermi immiinermilu takorluukkatut iluanaarutinit nikingassutaasut allanneqassapput.
- 4) Oqimaalutaanermi takorluukkatut iluanaarutinit nikinganerit imaluunniit tunisassatut eqqarsaatigineqartunik ikiaroonartunik pineqartunik mikininngorlugit aggorlugit immiinerit.
- 5) Piareersakkanik nr. 3-mi taaneqartunik, imm. 1-imi ikiaroonartunut taaneqartunut ilaatinneqanngitsunik taakkunanngalu annissinissamut akuersissuteqartariaqanngitsunik annissineq.
- 6) Misissueqqissaarnermik siunertaqartumik atuineq aamma suunera, annertussusaa aamma atuinerit ataasiakkaat ullui allanneqarlutik misileraanerit misissueqqissaarnermik imaluunniit ikiaroonartup pineqartup atorineqarsimaneranut misiliinermik nalinginnaasumik uppersaasumik allaaserinnineq.
- 7) Ikiaroonartut eqqaaneqartut aserorterneqartut annertussusii.
- 8) Ikiaroonartunut allanut imaluunniit ikiaroonartuunngitsunik allanik allannguneq ikiaroonartut taaneqartut annertussusii suunerilu kiisalu taakkunannga pissarsiat.
- 9) Ikiaroonartut eqqaaneqartut sananeqartut imaluunniit naatinneqartut annertussusii.
- 10) Ikiaroonartunik taaneqartunik sananermi atorineqartut immikkut atortussiat annertussusii.
- 11) Toqqorsivinni pigineqartut ikiaroonartut taaneqartut annertussusii, imatut immikkoortiterneqarlutik takuneqarsinnaalluni ikiaroonartut imaluunniit naasunit nakorsaasiassat pigineqarnersut, suliarineqarnersut, piareersarneqarlutik naammassineqarsimasut aamma tuniniagassatut poortorneqarsimallutik naammassisimasut qanoq annertutigisut.
- 12) Ikiaroonartunik taaneqartunik naatitsinermi atorineqartut naasut annertussusii.

Imm. 3. Imm. 1-imi ikiaroonartut immikkoortortat aqputigalugit niuerutigineqarpata taakku immikkut naatsorsuusiorteqassapput.

Imm. 4. Ikiaroonartunik imm. 1-imi taaneqartunik suliaqarnermut tunngatillugu naatsorsuutit allallu allagaatit sivikinnerpaamik ukiuni pingasuni toqqorsimaneqassapput.

Imm. 5. Imm. 1-imi taaneqartunut ikiaroornartunut tunngasunik toqqorsivinniittunik naatsorsuineq akuttunngitsumik isumagineqartassaaq, taamaattorli qaammatini pingasukkaani ikinnerpaamik ataasiarluni.

Ikiaroornartunik ingerlataqarfiit allat

§ 13. Annissinermut eqqussuinermillu, pilersuinermit, sananermut imaluunniit niuernermit allaanerusumik ikiaroornartunik ingerlataqarnerit allat Nunatsinni Nakorsaaneqarfimmit tamatumunnga akuersissuteqartunit inunntut, suliffeqarfinnut, laboratorianut ingerlataqarfinnullu taamaallaat akuerisaavoq.

Imm. 2. Imm. 1-imi aalajangersagaq apeqqutaatinnagu pisortanit pigineqartut pinngortitalerinikkut, nakorsatut ilisimatusarnermi atortorissaarutigullu laboratorianut ingerlataqarfinnullu, ingerlataqarfiup nalinginnaasumik suliaqarfiata iluaniittunut siunertanut ikiaroornartunik immikkut akuersissuteqarnani atuisoqarsinnaavoq.

Ikiaroornartunik ingerlataqarnermut akuersissutip utertinneqarnera

§ 14. Ikiaroornartunik suliaqarnissamut akuersissut Nunatsinni Nakorsaaneqarfimmit nalunaarutigineqarsimasooq qaqugukkulluunniit atorunnaarsinneqarsinnaavoq. Akuersissummut atasut naammasseqqusat piumasaqaatillu eqqortinneqarsimanngippata, Nunatsinni Nakorsaaneqarfiup nakkutilliisuanit peqqussutaasut malinneqarsimanngippata, imaluunniit ikiaroornartunik suliaqarnerup isumagerani mianersortoqarsimanngippat imaluunniit sumiginnaasoqarsimappat akuersissutip nalunaarutaasimasup atorunnaarsinneqarnissaa naatsorsuutigineqarsinnaavoq.

Imm. 2. Nunatsinni Nakorsaaneqarfiup ikiaroornartunik suliaqarnissamut akuersissut nalunaarutigineqarsimasooq qaqugukkulluunniit killilersinnaavaa imaluunniit allanngortissinnaavaa.

Imm. 3. Ikiaroornartunik suliaqarnissamut akuersissummik nalunaarutigineqarsimasumik utertitsisoqarpat ikiaroornartunik uninngasuutit qanoq pineqassanersut pillugit Nunatta Nakorsaataasivia erseqqinnerusumik aalajangersaasinnaavoq.

Nakkutilliineq

§ 15. Suliffeqarfiit, laboratoriat ingerlataqarfiillu ikiaroornartumik suliaqarnissamut Nunatsinni Nakorsaaneqarfimmit akuersissuteqartut ikiaroornartut eqqortumik isumaginissaannut akisussaasumik inummik toqqaassapput.

§ 16. Nunatta Nakorsaataasivia, nunap immikkoortuini napparsimmaviit, peqqissaaviillu ikiaroornartunik suliaqarnerannik Nunatsinni Nakorsaaneqarfik nakkutilliisaaq.

Imm. 2. Matumunnga malittarisassat atuuttut naapertorlugit uumasut nakorsaasa ikiaroornartunik ingerlataqarnerannik nakkutilliisoqassaaq.

Imm. 3. Ikiaroornartunik suliaqarnissamut Nunatsinni Nakorsaaneqarfimmit immikkut akuersissuteqartunik inunnik, suliffeqarfinnik aamma laboratorianik Nunatsinni Nakorsaaneqarfik nakkutilliisaaq.

Imm. 4. Taakku ikiaroorartunik suliaqarnerannut tunngasunik pisortanit pigineqartut pinngortitalerinikkut, nakorsatut ilisimatusarnermi atortorissaarutitigullu laboratorianik pisortallu suliffiini Nunatsinni Nakorsaaneqarfik nakkutilliisinnaavoq.

Imm. 5. Pisariaqarsorineqarpat naapertuussorineqarpallu nakkutilliinermik oqartussaasut allat imm. 2-mi taaneqartutut nakkutilliissasut Nunatta Nakorsaaneqarfiata aalajangersinnaavaa.

Imm. 6. Nakkutilliinerit imm. 1-4-mi eqqaaneqartut pisariaqartinneqartutut akulikitsigisumik ingerlanneqassapput. Oqartussat nakkutilliisut ininut, uninngasuutinut, atuakkanut niuernermilu pappiaqqanut, suliaqarnermut pineqartumut tunngatillugu nakkutilliinissamut pisariallit akornuserneqaratik pissarsiarisinnaavaat.

Imm. 7. Inuk, suliffeqarfimmik piginnittoq, laboratoriami imaluunniit ingerlataqarfimmi aqutsisoq nakkutilliisup kissaatigisinnaasaanik ikiaroorartunik suliaqarnermut tunngasunik paasissutissanik tunniussinissamut qaqugukkulluunniit pisussaafeqarpoq.

Imm. 8. Amigaatit, nakkutilliinermi uppersarneqartut ingerlaannartumik iluarsineqassapput.

Immikkut ittumik akuersissuteqarneq

§ 17. Nunatsinni Nakorsaaneqarfik § 5-imit, § 10-mit, § 12, imm. 2-mit, 4-mit aamma 5-imit aammalu § 15-imit immikkut akuersissuteqarsinnaavoq, akuersissut peqqissutsitigut aarlerinartutut pingaarutilittut nalilerneqanngippat pissutsillu immikkut ittut matumunnga pissutissaqartitsippata.

Imm. 2. Danmarkimi Lægemiddelstyrelsenimut ilisimatitsisoqareerpat aatsaat imm. 1 naapertorlugu Nunatsinni Nakorsaaneqarfik § 10-mit immikkut akuersissuteqaqqusaavoq. Ilisimatitsissummi Nunatsinni Nakorsaaneqarfik eqqussinermi imaluunniit annissinermi uppersaammik Danmarkimi Lægemiddelstyrelsenimut qinnuteqassaaq aammalu nunami eqqussiffiusussami annissiffiusussamiluunniit oqartussaasut susasaqartut eqqussinermi imaluunniit annissinermi uppersaammik qinnuigineqassallutik.

Pineqaatissiisutit

§ 18. §§ 2-8-mik aamma § 9, imm. 3-mik, § 10-mik, § 11-imik, 12, imm. 2-5-imik, § 13, imm. 1-imik, § 14 imm. 3-mik, § 15-imik, aamma § 16, imm. 7-imik, aamma 8-mik unioqqutitsisoq pinerluttulerinermi inatsit malillugu pineqaatissinneqarsinnaavoq.

Atuutilersitsinermi ikaarsaarnermilu aalajangersakkat

§ 19. Nalunaarut 22. april 2024-mi atuutilissaaq.

Imm. 2. Tamatuma peqatigisaanik Ikiaroorartut pillugit Namminersorlutik Oqartussat nalunaarutaat nr. 59, 15. november 2023-meersoq atorunnaarsinneqarpoq.

Imm. 3. § 9, imm. 1 naapertorlugu qinnuteqaatit nalunaarutip matuma atuutilernerata kingorna naammassineqarsimanngitsut nalunaarut manna naapertorlugu suliarineqassapput aalajangiiffigineqarlutillu.

Namminersorlutik Oqartussat, ulloq 19. april 2024

Agathe Fontain (atsior.)
Peqqissutsimut Naalakkersuisoq

/ Nike Berthelsen (atsior.)

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut